



Vincentius natione Germanus à teneris annis bonis literis operam dedit, & prima rudimenta feliciter percepit. postea ad doctorum uirorum gymnasia accedens, Græcæ & Latinæ linguæ, & in primis arti Poëticæ diligenter incubuit, & talem in ijs sibi usum comparauit, ut nulli secundus esse uideretur. Itaque partim suis partim aliorum scriptis ab interitu uindicatis & in lucem editis, postea de literis optimè fuit meritus. Inter quæ sunt Cōpēdiosa explicatio Græca incerti autoris in errores Vlyssis per contemplationem moralem, cum Græco Symposio Xenophontis, quam Hagenoæ anno millesimo quingentesimo tricesimo primo edidit.

præterea precesiones Græcè per eum publicatæ. Sic in Demosthenis orationes castigationes & diuersæ lectiones, uetustissimi cuiusdam exemplaris subsidio, collectæ. Annotationes insuper in quatuor libros Græcorum Epigrammatum. Extant quoque Homeri aliquot libri Iliados, partim à Vincentio, partim à Nicolao Valla uersi, & Basileæ editi. Itaque Vincentius præclaris suis studijs, atque multis alijs Heroicis uirtutibus effecit, ut hoc loco inter præclaros Germaniæ uiros meritò recenseatur. Con. Gess.